

**Kes rasuah dilapor meningkat kerana rakyat tidak lagi takut - PM
Astro Awani
22 Januari 2019
Israr Khalid,**

LAXENBURG: Rakyat sudah tidak lagi berasa takut untuk melaporkan aktiviti rasuah kepada pihak berkuasa, menyebabkan peningkatan dalam kes rasuah yang dilaporkan sejak akhir-akhir ini.

Perdana Menteri Tun Dr Mahathir Mohamad berkata, dasar kerajaan Pakatan Harapan (PH) meyakinkan rakyat untuk tanpa ragu-ragu melaporkan sebarang aktiviti salah laku.

Menurutnya, PH komited memerangi rasuah dan penyelewengan dengan pendekatan strategik serta telus.

"Kes kini meningkat, tetapi bukan berlaku semasa kerajaan baharu, sebaliknya ketika kerajaan terdahulu.

"Orang ramai dan pegawai kerajaan tidak lagi gusar atau diancam apabila memberi maklumat berkenaan perkara yang tidak betul dan menyalahi undang-undang," katanya ketika bersyarah di hadapan delegasi 36 buah negara di Akademi Anti-Rasuah Antarabangsa (IACA) di sini pada Isnin.

Beliau menyampaikan syarahan bertajuk 'Memerangi Rasuah di Malaysia: Pencapaian, Cabaran dan Perspektif' di International Anti-Corruption Academy (IACA) di sini pada Isnin.

Dr Mahathir turut berkata, orang ramai kini merasakan lebih bebas untuk memberikan maklumat mengenai sebarang perlakuan rasuah dan perlindungan turut diberikan kepada mereka di bawah Akta Perlindungan Pemberi Maklumat 2010.

Menurutnya, aktiviti rasuah dikategorikan kepada dua peringkat iaitu suapan secara tersembunyi atau 'bawah meja' dan suapan terang-terangan atau 'atas meja.'

Katanya, masih ada harapan untuk pencegahan sekiranya ia dilaksanakan secara 'bawah meja'.

Namun keadaan dianggap parah apabila rasuah diberi secara terbuka ‘atas meja’ dan perkara itu menjadi kebiasaan apabila rakyat terpaksa melakukannya untuk membolehkan apa yang dihajati dapat dilunaskan.

Beliau percaya, budaya memainkan peranan penting dalam pencegahan rasuah dan perlu dipupuk sejak kecil bahawa perlakuan menyogok itu adalah kotor dan salah.

Dalam usaha kerajaan baharu Malaysia memerangi rasuah secara habis-habisan, kata Dr Mahathir, pelbagai kaedah dirancang dan dilaksanakan.

Ia termasuk mewajibkan seluruh anggota Kabinet, termasuk Perdana Menteri, untuk mengisytiharkan harta masing-masing kepada Suruhanjaya Pengegahan Rasuah Malaysia (SPRM).

Malah, kerajaan juga menetapkan penggal pentadbiran seseorang Perdana Menteri dihadkan kepada hanya dua penggal atau 10 tahun sahaja serta dalam usaha untuk memendekkan proses birokrasi dalam perkhidmatan awam.

“Sebanyak mana undang-undang dipinda atau diperteguh, korupsi tidak boleh dihapus secara seluruhnya.

“Apa yang boleh dilakukan adalah mengurangkannya ke tahap yang paling minimum,” tambah Dr Mahathir.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/kes-rasuah-dilapor-meningkat-kerana-rakyat-tidak-lagi-takut-pm-196603>

